

30 AUG 1998

Mahathir - tiba

PERDANA MENTERI TIBA UNTUK SAMBUTAN HARI KEBANGSAAN

PULAU PINANG, 30 Ogos (Bernama) -- Perdana Menteri Datuk Seri Dr Mahathir Mohamad tiba di Lapangan Terbang Antarabangsa Bayan Lepas di sini hari ini bagi menyertai sambutan Hari Kebangsaan yang diadakan di negeri ini tahun ini.

Sejurus ketibaannya, Perdana Menteri dijadualkan mengetuai acara konvoi "EON Jambatan Pulau Pinang Pandu Proton Merdeka" bersama 1,998 pemandu kereta jenis proton.

Dr Mahathir akan memandu kereta Proton Wira yang pernah diturunkan di Kutub Utara untuk melintasi Jambatan Pulau Pinang dan konvoi yang terpanjang di dunia itu akan dicatat dalam 'Malaysia Book of Records' dan juga 'Guinness Book of World Records'.

Perdana Menteri juga akan menghadiri majlis santapan malam bagi meraikan Seri Paduka Baginda Yang Dipertuan Agong Tuanku Ja'afar Almarhun Tuanku Abdul Rahman dan Raja Permaisuri Agong Tunku Najihah Tunku Besar Burhanuddin yang berada di negeri ini bagi menghadiri sambutan Hari Kebangsaan di sini esok.

Dr Mahathir kemudiannya akan hadir pada majlis sambutan Malam Merdeka di Esplanade dan menaikkan bendera Jalur Gemilang pada tepat pukul 12 malam.

Pada majlis itu juga Perdana Menteri akan menyampaikan amanatnya kepada rakyat Malaysia serta menerima sumbangan Dana Khas Negara daripada negeri ini oleh Ketua Menteri Tan Sri Dr Koh Tsu Koon.

-- BERNAMA

AA WAT